

## Til

Hjarte mitt er fylt av deg,  
hugen min trylt av deg,  
i meg du er.  
Trøytt under dagens bør,  
sveipt under draumeslør:  
du er meg nær.

Gøym meg i armen din,  
stryk over hår og kinn,  
seg du er mi!  
Barndommens bleike vår,  
hungrande ungdomsår  
stilt går forbi.

Opn dine augo att!  
Blå som ein månenatt  
ser eg dei no.  
Dogga av draum dei er,  
sloknande stjerner der  
stilt går til ro.

Sansevill brenner eg,  
håret ditt kjenner eg  
mjukt mot mitt kinn,  
viljen din bøyer seg,  
munnen din tøyer seg  
tyrst i mot min.

Evige undermakt,  
alt er deg underlagt,  
dagen din renn.  
Eld, du som nærer oss,  
eld, du som tærer oss,  
brenn!